

ՈՐՈՇՈՒՄ

ԱՆՀԱՏԱԿԱՆ ԴԻՄՈՒՄԻ ԸՆԴՈՒՆԵԼԻՈՒԹՅԱՆ ՀԱՐՑԻ ՎԵՐԱԲԵՐՅԱԼ
քաղ. երեւան 6 ապրիլի 2009թ.

Հայաստանի Հանրապետության Սահմանադրական դատարանի 1-ին
դատական կազմը

Նախագահությամբ՝ Կ. Բալայանի
Անդամակցությամբ՝ Վ. Հովհաննիսյանի
Ձ. Ղուկասյանի

Քննության առնելով Սամվել Շուշանյանի դիմումի ընդունելիության հարցը

ՊԱՐԶԵՑ

1. Քաղաքացի Սամվել Շուշանյանը 24.03.2009թ. դիմել է սահմանադրական դատարան՝ վիճարկելով «Բազմաբնակարան շենքի կառավարման մասին» ՀՀ օրենքի 10 հոդվածի 3-րդ կետով սահմանված դրույթի սահմանադրականությունը:
2. Դիմողը ՀՀ սահմանադրական դատարան ներկայացրած դիմումում խնդրել է «Բազմաբնակարանային շենքի կառավարման մասին» ՀՀ օրենքի 10-րդ հոդվածի երրորդ կետը ճանաչել ՀՀ Սահմանադրության առաջին հոդվածով սահմանված՝ իրավական պետության սկզբունքին հակասող և անվավեր:

Վիճարկվող դրույթի հակասահմանադրականության վերաբերյալ դիմողը ներկայացրել է հետևյալ հիմնավորումները.«...Օրենքի վիճարկվող դրույթում առկա է օրենսդրական բաց, որի հետևանքով առաջացել է իրավական անորոշություն և իրավակիրառ պրակտիկայում վիճարկվող օրենքի կիրառման հակասահմանադրական պրակտիկա:

«Բազմաբնակարան շենքի կառավարման մասին» ՀՀ օրենքի ուսումնասիրությունից բխում է, որ պարտադիր նորմերի կատարմանն ուղղված վճարը,

հանդիսանալով կատարվելիք պարտադիր աշխատանքների դիմաց գանձվող վճար, իրենից ներկայացնում է քաղաքացիաիրավական հարաբերությունների տարր, և որպես այդպիսին նման գումարի գանձման համար իրավական հիմք կարող է հանդիսանալ բազմաբնակարան շենքի սեփականատերերի, որոնք այդ իրավահարաբերություններում գործում են համատիրության, կամ լիազորագրային կառավարչի, կամ հավատարմագրային կառավարչի միջոցով, և համապատասխան աշխատանքներ կատարողի միջև կնքված քաղաքացիաիրավական պայմանագիրը: Մինչդեռ, նման իրավակարգավորումը համահունչ չէ ՀՀ քաղաքացիական օրենսգրքի համապատասխան պահանջներին այնքանով, որքանով, որ չի նախատեսում քաղաքացիաիրավական պայմանագրի կնքում, և պարզ չէ, թե ինչն է այդ դեպքում փոխարինում պայմանագրին: ...Օրենսդրական բացը կայանում է նրանում, որ վիճարկվող դրույթում «շինության սեփականատերերի ժողովի կողմից սույն օրենքով սահմանված կարգով հաստատված նորմերից» բառակապակցության կիրառման իրավական մեխանիզմը բացակայում է:

...Բացի օրենսդրական բացից, վիճարկվող դրույթում վերոնշյալ բառակապակցությունն առաջացնում է նաև իրավական անորոշություն: Իրավակիրառ պրակտիկայում դրան տրվել է այնպիսի մեկնաբանություն, որ նշված բառակապակցությունը նշանակում է պարտադիր նորմերի կատարմանն ուղղված վճարի չափ, մինչդեռ դա իրավակիրառողի կարծիքն է»:

Քանի որ դիմումը բավարարում է «Սահմանադրական դատարանի մասին» ՀՀ օրենքով սահմանված անհատական դիմումին ներկայացվող պահանջներին՝

- Դիմողը սպառել է դատական պաշտպանության բոլոր միջոցները,
- Սամվել Շուշանյանը ՀՀ սահմանադրական դատարան է դիմել «Սահմանադրական դատարանի մասին» ՀՀ օրենքի 69-րդ հոդվածի 5-րդ կետով նախատեսված 6-ամսյա ժամկետում /վերջնական դատական ակտը՝ ՀՀ վճռաբեկ դատարանի որոշումը վճռաբեկ բողոքը վերադարձնելու մասին, կայացվել է 2008թ. սեպտեմբերի 25-ին/,
- Վիճարկվող նորմը կիրառվել է դիմողի նկատմամբ:

Ղեկավարվելով Սահմանադրական դատարանի մասին ՀՀ օրենքի 69-րդ հոդվածի 1-ին, 3-րդ, 5-րդ, 6-րդ կետով, Սահմանադրական դատարանի 1-ին դատական կազմը

Քաղաքացի Սամվել Շամշյանի դիմումը՝ «Բազմաբնակարան շենքի կառավարման մասին» ՀՀ օրենքի 10 հոդվածի 3-րդ կետի սահմանադրականությունը վիճարկելու մասին, ընդունել քննության, կազմել գործ, որով պատասխանող կողմ ճանաչել ՀՀ Ազգային ժողովին:

Նախագահող՝

Անդամներ՝

